

# ԱՐՑԱԽԻ ՀԱՐՑԸ ՄԱՐԴԿԱՅԻՆ ԻՐԱՎԱՆՅ ՆՍՏԱՇՐՋԱՆՈՒՄ

ԺՆԵՒ.- Այստեղ, Ազգություների պալատում, հունվարի 28-ից ի վեր իր աշխատանքն է շարունակում ՄԱԿ-ի մարդկային իրավունքների հանձնախմբի 47-րդ տարեկան նստաշրջանը, օրակարգի վրա ունենալով 1990 տարեշրջանի ընթացքում աշխարհի տարբեր կողմերում ազգերի, հասարակական և տարիքային տարբեր խմբերի ու փոքրամասնությունների նկատմամբ ի գործ դրված հալածանքների, խտրականությունների, մարդկային և ազգային իրավունքների գծով խախտումների մասին տեղեկագրեր:

Հունվարի 30-ին նստաշրջանում արձարծվել է նաև Արցախի հարցը, իբրև ազգային ու մարդկային ինքնորոշման իրավունքի քոնսարման կոպիտ օրինակ: Այն արձարծողն էր «Մարդկային իրավունքների միջազգային դաշնակցությունը», որի կենտրոնը գտնվում է Փարիզում: «Նկատի ունենալով, որ Ադրբեջանում և Լեռնային Ղարաբաղում դեռևս շարունակվում են հայ ազգաբնակչության դեմ իշխանությունների հալածանքները, շրջափակումներն ու

հայերին արտագաղթի մղող արարքները,- ասվում է տեղեկագրում,- Մարդկային իրավունքների միջազգային դաշնակցությունը ՄԱԿ-ի մարդկային իրավունքների հանձնախմբից պահանջում է կողմ արտահայտվել Լեռնային Ղարաբաղում պարետային ժամի վերացմանը և տեղական իշխանությունների վերահաստատմանը՝ ընտրությունների միջոցով: Արցախի ժողովուրդը պետք է օգտվի իր ինքնորոշման իրավունքից՝ հանրաքվեի միջոցով, համաձայն Խորհրդային Միության սահմանադրության և Հասարակական ու քաղաքական իրավունքների Ուխտի»:

ՄԱԿ-ի հանձնախմբի նստաշրջանը, որի աշխատանքներին մշտական 43 անդամ երկրներից բացի մասնակցում են նաև շուրջ 100 այլ երկրների ներկայացուցիչներ, ինչպես նաև 50 ոչ կառավարական կազմակերպություններ, իր նիստերը կավարտի մարտի 8-ին, եթե կհրապարակվեն նրա եզրակացություններն ու հայտարարությունները: